

سرقوا الغوايش



نفس الطريق اللي الشجر

سافر وسأبه من زمن

رايح يبيع الضلّ في بلاد العجر

راح يشتري جلد العجل

راح يشتري الجنازير

وامتار صفيح.. طيارة تطيح

سمّوها ليه الطيارات؟!!

يمكن تتوه شبه الأجل.. لما يطير

ينزل على فروع الشتات

بعيدان حديد، قالوا السلاح

دروع بتحمي من العبط ومن الهبل

فتحوا القانون على كل شئ

يصبح مباح...

كدا من سكات؛

مين اللي تحويشة سنيئه اتبعزقت؟!!

خلاخيل في رجلين البنات

ما سمعش صوتها غير ديابة اترصّصت

حلم الخلاص محتاج لتحصل معجزات

سحبوا الغوايش كلها واتفرّقت

خافوا العيال.. اتغرّبوا

سابوا الحارات من غير ونس

كل البيوت متشوّقة يسكن نفس

غير اللي مات...

الأرض فينا اتشقّقت

بلعت بدارها في المسا
الصبح دايـس ع الفانوس
كل العيال متونّسة
في العتمة يظهر كام كابوس
نُصّ الرغيف...
يغرق في بير وجع الشتا
ونُصّه تايه في العرق
كل اللي راحوا ف حر صيف
كان حلمهم أبيض نظيف
لكن خسارة راح عرق
شافوا القمر...
في بحار ما تعرفش الرجوع
رابط رقبتـه في السما

ما عادتش تفرق لو بكا دم ودموع

أو حلّ حبل المشنقة

ينزل صريع

على أرض بتدّر الشقا

ف جوف الرضيع

ملعون أبوها البطن لو كان حلمها

تملا الجناب وتسدّ جوع

الحرب دايرة كل يوم

صواريخ بتضرب في النجوم

تسقط على رؤوس البشر

الموت خلاص زي المطر

نازل غبي.. نازل عفي

حالف ليكسر في الضلوع نبض الحياة

يتحنّى بتراب العجوز المنكفي

صوته اللي مات...

ما قدرش حتى يقولها آه

الموت شقى...

سهمه اتعمى، وما عادش شايف الاتجاه

كل اللي باقى ف أرضنا..

دخان و صوت

ساعة استغائة...

وساعة نوح.. سكن البيوت

كل اللي باقى ف عمرنا صرخة نبي...

يتلّم حوالية الحمام

غصن الزيتون..

دبلان قوي شبه الجفون

كذبوا علينا يوم ما قالوا الحرب دا

أول طريق.. آخره السلام

كل القلوب اتحوّلت كتلة حديد

زي المَكَن.. زي الآلات

بغداد...

لسّاها واقفه في العزا

صنعا اليمن، ولّا ف حلب

باشت أراضين العرب

ما بقتش رملة تتعشق، ولا حتى طين

معجون بدم الأوليا والصالحين

ولا عاد لا صهر ولا نسب

وما عادش باقي غير يادوب

صوت الآدان..

والمقرئين، والمنشدين

صوت الغُنا والدندنة...

دائمًا حزين

ملعون أبوها الدبابات والطائرات

سرقوا الغوايش م البنات